



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 5

Yangia anidakangma :



Tir Yimym



tiryimym@aolima




tir yimym

TAPAK 8

Sangkum Pope Francis-i Turkey semdangtsü

Arne Slot-i Liverpool coach Jurgen Klopp melentsü

VOL. XXI ISSUE NO. 216 (ADOK 216) DIMAPUR AMUNGNÜ (SUNDAY) MONUPII (MAY) 19, 2024 ₹ 5.00



Taonung 8:00 ako meta ka Imkongliba Memorial District Hospital (IMDH) Mokochung nung Dialysis room nung mokozü tulu adokba ngua mozüki nung amonger aser temeket nung alirtem posatep, aser kara kara dang Fire Service gari jaoker ki takdangji lapoka repring nung mokozü alongba dak alaka mibo madoki liasü, aji asünung Fire Service gari-ji mamshii meyipa oadok. Medical Superintendent (IMDH) Dr. Marina den Tir Yimym-i iba tatalokba osang metetnüa asungdangba mapang lai light timtem ajanga iba ya adokba amai aser oset tilateri kar raksaba dak alaka timtem ulurabo majuru, saka asung-ang tejangjaba metettsü ta metetdaksü.

ASU-i Indian Army nungi teyari magitsü tuyur

Dimapur, May 18, 2024 (Agencies): Angami Students' Union (ASU)-i Indian armed mesüra paramilitary forces den amalitep malitsü nenshia metetdaksüogo.

Naga Students' Federation (NSF)-i tetuyuba agütsüba nung ajemdaker parnok i iba ya metetdaksü aser Armed Forces Special Powers Act (AFSPA) aitsüogo.

Naga nung mapang talangka AFSPA kübok Indian armed forces ket nung timtem arur aser yimjung meimba Naga nung maneni shisabulu tia ka nung lir. Küm aika Indian armed forces ket nung tai maketba Naga nungeri timtem touthi jenti ajangshia arur, ta ASU-i metetdaksüogo.

Parnokisa Centre sorkar dang tangsa AFSPA agientsü aser

Supreme Court dang Naga nung meimchir temeten lepa bener arua AFSPA samatsütsü ayongzükogo.

ASU-isa parnok kübok aliba unit ajak dang Angami lushi nung kija mesüra telok shingai Indian armed forces nungi teyari meshia magitsü tetuyuba agütsüogo.

Maneni, kija mesüra telok shingai Angami lushi telongtet nung ayongzükba sentong nung Indian armed forces mejaoktsü mesüra armed forces-i ayongba sentong nung shilem magitsü ASU-i tetuyuba agütsüogo.

ASU-isa Angami nung aliba tesemtem nung mapa lemozüka aliba Indian armed forces-i item tetuyuba den meputepba mapa meinyaktsü asoshi kümdanga alitsü metetdaksüogo.

Northeast nung tzunglu kanga arutsü: IMD

Guwahati, May 18, 2024 (Agencies): Northeast India nung hopta ka shi tzunglu arutsü ta India Meteorological Department (IMD)-i metetdaksüogo.

Arunachal Pradesh, Assam, Meghalaya, Nagaland, Manipur, Mizoram, Tripura kübok tesem balala nung tzunglu terara arutsü aser West Bengal o Sikkim nung kanga arutsü ta IMD-i ashir.

Debar tashi Arunachal Pradesh nung tzunglu kanga arutsü. Assam aser Meghalaya nung Hombar tashi aser Nagaland o Manipur nunga Deobarnü tzunglu arutsü ta parnokisa metetdaksüogo. Meghalaya nung Deobar aser

Hombar anogotem tzunglu kanga arutsü akok aser 115mm tema arutsü ta IMD-i ashi.

IMD-isa Honibar aser Deobar anogotem Bihar aser Deobar nungi Hombar tashi Assam aser Meghalaya asoshi 'orange alert' metetdaksüogo.

IMD-isa taruba anogo pungu tashi Eastern aser Northeastern state tem nung alirtem dang 'yellow watch' asütsü metetdaksüogo.

India Meteorological Department (IMD)-isa taoba hopta North East region nung heat wave sütsü metetdakja liasü.

May 16, 2024 tashi Northeast nung 5 degrees above normal tatsük akümtsü ta parnokisa ashi.

SEC-i ENPO dang ULB election nung shilem agitsü mepishir

Dimapur, May 18, 2024 (TYO): State Election Commission of Nagaland-i Eastern Nagaland People's Organization (ENPO) dang Urban Local Body (ULB) elections nung shilem agitsü mepishia metetdaksüogo.

ENPO-i kechi tebilemstü atema noktaker onoki angateta lir saka ULB election nung shilem magitsü ta asüba ya khen junga shisadangtsü nungdaker ta SEC-i ashi.

"Vote agütsütsü temeten aliba senso shia vote agütsütsü linük temzung ajanga melar. Vote magütsütsü ta asüba jia iba temeten dak keta lir saka nija kati dang ibaji lemtettsü akok. Nisung ka vote ka ta dang agütsür aser voting ya külemi inyakba mapa ka masü anungji nisung kati

tangar shingai ashiba mangai pa mulungsentü agi iba temeten ya amshitsüla" ta Commission-i metetdaksü.

Nagaland state nung ULB elections ya Supreme Court ketdangsuba kübok lir aser Nagaland nung kija/telok aika nem notice of contempt agütsüogo. Kija mesüra telok kati election maparen nung meinprongra mesüra timtem agütsür ibaji okadak tetuyubatem anema asütsü aser ozüng kübok timtem ajurutsü akok ta parnokisa ashi.

Nagaland nung Municipal aser Town Councils ama Urban Local Bodies ya nisungtemi election nung shilem agiba ajanga dang tentettsü. Iba ya nübortem terenlok aser tejakleni aotsü atema

kanga dang tongtipang lir aser tongti shilem agir ta Commission-isa metetdaksü.

April 29, 2024 nü sangdongba ama Nagaland nung Municipal aser Town Councils elections tiptema agitsü atema Commission-i mapa inyaker. Elections ajanga municipality areas nung alirtemi tenokdangba kecha melii aser mulungsoa vote agütsütsü temeten amshia shilem agitsü imlar, ta parnokisa ashi.

Item onük nung ajemdaker ENPO-i ULB elections nung shilem magitsü tetuyuba agütsüba meyipa repringshitsü mepishiogo aser State Election Commission, Nagaland-i akokba tashi polling maparen shitak inyaktsü merangtsü ta parnokisa ashi.

Nagaland nung arogotemi matamabensar atema inyaktsü ajungshir



May 18, 2024 nü Hotel Japfu nung "Accessibility in the Church" omen nung ajemdaker Global Accessibility Awareness Day amongdang agiba noksa ka angur.

Kohima, May 18, 2024 (TYO): Nagaland nung matamabensaba wadang mapang talangka senzuka yutsüogo ta Nagaland State Commissioner for Disabilities, Niethono Nakhro-i ashi.

"Tesüiba küm aika sorkar mesüra loktiliba nung disability sector atema temulung magütsü" ta Nakhro-i ashi.

May 18, 2024 nü Nagaland State Disability Forum (NSDF)-i Global Accessibility Awareness Day ayongzükba amongdang lai iba onük jemi.

Iba sentong nung State Commission for persons with disabilities (PwDs)-ia yaritep aser "Accessibility in the Church" omen nung ajemdaker agi.

Iba anogo ya küm shia May ita tasembuba Brihostibarnü amonger saka taküm Naga Plebiscite Day denjiba ajanga tanü ang among.

"Naga loktiliba nung asenoki kinunger matamabensartem senzuka meyutsür saka kari dang iba amaji inyaker. Asenoki külem kinungertem kümzükba ayur aser

matamabensartem bendanga amshiba ajanga kibong aikati matamabensartem yimjaki moudaktsür mesüra lokti nung mesenzüdaktsür" ta Nakhro-isa ashi.

"Mapang talangka matamabensartem senzuka yutsüogo aser iba arogo dena loktii parnok temeten aser nungdakter asoshi mebilemstü dang aruogo. Iba wadang asoshi arogo shilem tongti agitsüla aser arogo sasep nung dang masü saka loktiliba nung PwDs anioktsü atema tangatetba prokshitsüla" ta laisa ashi.

Arogo kari PwDs nem teyari terabo agütsür saka arogo aikati metetsümonga mesüra memeteti PwDs züngdoker. Arogo dak tashi lir aser nübortem anir aruteter anungji arogo PwDs pur ajanzüktsü osang prokshitsüla aser loktiliba nung parnok densemdaktsütsü atema tangatetba agütsütsüla ta Nakhro-i ashi.

"Kütem süia arudang tensa tajungba melenshir aser mapa

tajung aika inyakdar. Item asoshi onok pelar saka ano teinyaktsü aika lir. Arogoi PwDs ajungtsü atema osang tajungba prokshitsüla aser nübortem nem angatetdaksütsüla" ta laisa ayongzük.

"Matamabensaba ya tapu aika lir aser arogotemi PwD züngsemtem asoshi facilities agütsütsüla. Parnokia Tsüngrem o angatsü aser arogo dak sendakba osangtsüsang metettsü atema sign languages bentsütsüla" ta Nakhro-isa tebilemka ka lemsatapa liasü.

Iba mapa nung Commission aser Nagaland State Disability Forum-i arogo den yariteptsü mulunga lir ta State PwD commissioner-isa shisem.

Iba sentong nung PwDs tenung nung Amenuo Khoubve-i o jembidang parnok senzuka yutsüba aser timi merepringba indang olen kar lemsatap.

Sentong nung onirji Viketukho Nakhro liasü aser Eliza Chishi-i sign interpreter shilem agi.

Kohima Press Club-i merekmeju sentong ayongzüka agi



Dimapur, Monupii/May 18 (TYO): May 18 nü Kohima Press Club (KPC) züngsemtemi, Made in Nagaland den atonga Press Club nem lenzükja aliba ali tasenba merektetba sentong ka ayongzüka agiogo.

Iba sentong nung ajak senteper züngsem 24-i shilem agia liasü. Iba tesem merektetba nung shilem tajung agiba atema KPC tir Alice Yhoshü-i züngsem ajak dang kanga pelaba lemsatepba den tarutsü nunga maneni teyari agütsütsü mepeshia liasü.

Temetetsü kaji State Land

Acquisition Authority (SLAA)-i KPC nem ali agütsütsü temelaba agütsüba sülen Chief Minister Neiphiu Rio-i, February 27 nü 2024-25 budget press conference nung state sorkari iba tesem nung küm ka tsüingda Press Club building yanglutsü, ta ashi.

KPC indang office tejenba ya Old Secretariat nung liasü saka 2017 küm ULB anema longkak aitba mapang longkak aiteremi rongtokja liasü. Iba sülen Press Club pur office ka makai inyaksangshia arudar.

Yhoshü-i ashiba agi, Chief

Minister-i teti atema Press Club building ka yanglutsütsü tenangzükba agütsüba ajanga sorkari democracy nung osangbenertem shilem koda tongtibang iba indang angatetba sayur.

"State sorkari Press Club building tasen ka yanglutsütsü nangzükba atema yongya atar, koba state yimtiba nung media centre tongtibang ka asütsü aser iba ya tanga district aser state nungi aruba osangbenertem nüngdak peritsüba facility ka asütsü imla atar," ta lai ashi.

Longleng nung World Hypertension Day mungogo

Dimapur, Monupii/May 18 (TYO): Linük ajunga den külemi Longleng district nunga May 17 nü CHC, Yachem aser PHC, Yongnyah nung World Hypertension Day mungogo.

Iba anogomung ya "Measure Your Blood Pressure Accurately, Control it, Live Longer" omen nung ajemdaker munga liasü.

Longleng nung World Hypertension Day ayongzüka amungba mapang Dr. Lenpichang DPO, NCD

Longleng-i, nüburtem nem Hypertension indang tangazükba agüja liasü. Sentong nung o jembiba mapang pai, temang tozük tali mekümdaktsüi azüoka ayutsü aser teti exercise agiba den chiyongtsü shidak achitsü ajungshia liasü.

Paisa, high blood pressure ajanga temang nungi timtem bener arutsütsü ana nung aliba aser Hypertension indang symptom, iba tashidak kodaser nokdangtsü aser koda anepalutsü

iba indang metetdakja liasü. Dr. Lenpichang-isa, ajak dang Blood Pressure mapangshia tendanga alitsü ajungshia liasü.

Kasa mapang nung MO (Ayush) Yachem CHC Dr. Visino Nakhro-i, sentong tembangba sülen nüburtem Blood Pressure aser sugar levels tendangja tetuyuba balala agüja liasü.

Kasaji Longleng District kübok health unit ajak nung World Hypertension Day mungogo.

Taoba Dy Speaker Ralanthung Congress nung denogo

Dimapur, Monupii/May 18 (TYO): Taoba Nagaland Legislative Assembly Deputy Speaker Ralanthung Yanthan aser pa pusemertem May 17 nü Congress Party nung denogo.

Mallikarjun Kharge, Rahul Gandhi aser S Supongmeren Jamir nunger lenisüba nung Indian National Congress indang democratic principles tem tali tashi taitba

kümdaktsütsü nükjidong nung parnok Congress party nung denogo.

Nagaland Pradesh Congress Committee-i pa aser pa pusemertem kanga pelashishia

agizükogo aser tarutsü nung takok nguyonga aotsü imlaja ataba lemsatepogo, ta NPCC Communications Department sangdong ka ajanga metetdaktsü.

DDMA Kiphire-i refief fund lemetsü

Dimapur, Monupii/May 18 (TYO): District Disaster

Management Authority, Kiphire-i, May 18 nü Singrep aser Keor yimtsüing nung tzüinglu aser rür agi teraksatsüba bener arutsür aliba kibongtem nem Singrep Council Hall, Kiphire nung relief fund

lemetsüogo.

Temetetsü kaji May 8 nü tzüinglu kanga sashia aruba den rür agi Singrep aser Keor yimtsüing nung tsünüsenpongtsütem kanga mejungi raksaja liasü. Relief fund ya EAC Kiphire, Kudazo matsüingdang lemja liasü.

SA-II A/C BJP Mandal-i ayongzüka trekking den repsema Dzükou valley merektetba sentong agiogo

Kohima, Monupii/May 18 (TYO): Local MLA aser

Advisor for Prisons and Printing & Stationery, Kropol Vitsu-i achaayanga 15th Southern Angami-II Assembly Constituency BJP Mandal-i May 18 nü trekking den repsema Dzükou valley merektetba sentong ka ayongzüka agiogo.

iba tesem nung aliba lisopur ka ama merekmejua alitsü aser iba den tzüimopung, süngtonglitong aser arem shiruru wazüka aser kümzük ayutsü atema tangazükba agütsütsü asoshi BJP 15th Southern Angami-II-i iba trekking den repsema merekmeju sentong ya ayongzükogo, ta ashi.

Sentong tatsüka agiba mapang Kohima District BJP secretary Vipiho Rhetso-i, Dzükou valley ya Naga nunger aser talisa Southern Angami nunger atema Tsüngremi maotsüba alinük tebur tajung ka lir, ta ashi.

Advisor Vitsu kinungtsü densema party lenir aser züngsemtem noklang ka dak temai valley lenmang nung jana bendena liasü.

Thanaki, Viswema nung sentong ya 15-SA-II BJP mandal tir Pusato Zecho lenisüba nung agi aser Kehothul Hibo-i sarasadema liasü.

Iba dak sendakba nung pai,

Mokokchung 'Mascot Store' nung Café amenok



(Abelen) Nagaland Legislative Assembly, Speaker kinungtsü Sentirenla Jamir-i 'Mascot Store & Cafe' lapoktsüdang tangokba aser (Achiji) sentong nung adener ajak külemi tangokba noksa nung angur. (Mokokchung, 18th May, 2024)

Mokokchung, 18th May (TYO): Mokokchung nung bakery tejen 'MASCOT Store' nungto Coffee machine ka amenoka 'MASCOT Store & Café' ta tenüing jar 18th May, 2024 nü lapokogo. Nagaland Legislative Assembly, Speaker kinungtsü Sentirenla Jamir-i iba dokan meraketa lapoktsü aser Mokokchung Town Baptist Arogo, Associate Pastor, Rev. Tamsüwati Kichu-i ibaji

meshitettsü.

Bakery-ji akhi amato alitsü saka tang tasen ka amenokbaji café ji lir. Jangratemtsü kaji iba café nung Nagaland nung adokba coffee dang angutsü. Coffee menu nungji - Espresso, Espresso Macchiato, Americano, Doppio, Piccolo, Cortado, Latte, Latte Macchiato, Cappuccino, Mocha, Affogato aser Irish Coffee-tem angutsü. Item

coffee jenjangji senpak 60/- nungi tenzüka 300/- tashi indang angutsü.

Iba Café amenokba ya nüburtem rongnung coffee ajemtsü yimya sübadaktsütsü aser Nagaland nung Coffee lu ayimertem ajungkettsü nükjidong nung lapoker, ta Mascot Store & Café kibur tasenba tsürabur M. Süpong Longkumer jabaso Aliamoa S. Longkumeri osangbenertem

den jembidang ashi.

'Mascot Store' ya 1996 küm lapok. Küm 28 tashi arudang Mokokchung nüburtemi kanga meima yaria aruba asoshi ozü kibongi pelar aser ano tang nungi balaka service tajungtiba agütsütsü merangtsü, anungji, nüburtemi maneni nungita yaridaktsünür, ta paisa mepishia ashi.

Nagaland nung adokba coffee ya kanga tajung aser organic lir aser Nagaland coffee-ji alima ajunga nung nüngtugu süa odar. Iba coffee machine ya department of land & resources-i agütsü aser iba machine amshitsü asoshi dept-isa hopta ana (2) training agütsü aser maparen tenzüka aotsü (Startup) atema senotsü teyari mechimenu ka agütsüogo, ta dept of land resources, Mokokchung DPO, Sentinungla-i metetdaktsü.

Taoba mapang ibai junger ta bilemer 'Mascot Store' ya lapokogo, ano tensa den apet sütepa aotsü nükla yur tenzüker. Tanü nungi iba Mascot Store & Café ya par jabaso Aliamoa S. Longkumer aser jala Sanentila

S. Longkumer tena nem bendanga amoktsür, ta tsürabur M. Supong Longkumer-i metetdaktsü. Paisa café amenokba maparen nung yariteper aser Mascot lapoker küm 28 tashi arudang par kibong dang meimer ajak dang pelaba lemsatep.

Sentong nung Mokokchung Chamber of Commerce & Industry tir Tsükti Longkumer, MCCI Senior Advisor M.B Longkumer, land resources dept nungi A.I. L. Tamsu, MTBA Assoc. Pastor (w), Shilula parnokia shilem balala agia liasü.

Mascot Store & Café ya medemertem coffee jema mapang intoka otsü longtepa kazütsü tesem tajung ka asütsü, mapa balala inyakdang khenkhenbo tokolok kanga belemer, idangji satoktsü (refresh asütsü) atema yangji oa coffee cup ka meshia ajem nung ajungtsü, aji oda, ajung majung metetsü atema khen danga or semdangangma. Iba café ya Mokokchung Imkongmeren Sports Complex anasa lir.



Tawa New Delhi nung AAP nungi Rajya Sabha MP, Swati Maliwal dak teka sangshiba ken o dak sendakba nung May 18 nü DCP (North), Anjitha Chepyala-i Delhi Chief Minister, Arvind Kejriwal'er kidang kuli bushidang tangokba noksa nung angur.

LS elections shilem 5buba nung candidate 159 anema ken o benoka lir

New Delhi, May 18 (Agencies): Lok Sabha election shilem pongububa nung states aser union territories 8 nung Lok Sabha menden 49 atema tokteptsupur candidates 695 lir, aser parnok rongnung candidate shilem 23 anemabo ozüing alema inyakba ken o benoka lir, ta

Association for Democratic Reforms (ADR) aser National Election Watch-i metetdaksü.

Candidate 695 nungjagi candidate 159 anema ken o benoka lir, aser ibaji candidate shilem 23 lir, ta parnokisa metetdaksü.

Candidate 122 (shilem 18) anemabo ozüing alema inyakba ken o kanga tamajung benoka lir; item rongnung nisung tepsetba, nisung tepsettsü merangba aser tetsür anema inyakba ken otem densema lir, ta parnoki metetdaksü.

Item candidates rongnung parnok 28 anema nisung tepsettsü merangba ken o (IPC Section 307) aser candidate pezü anema nisung tepsetba ken o (IPC Section 302) benoka lir.

Ano tetsür anema inyakba ken o benoka alir candidate 29 nungi ka anemabo tashiyim

amshia tetsür raksatsüba (IPC Section 376) ken o benoka lir.

Rara adokdaksütsüsa aser yimsü nung ajemdaker telemsa adokdaksütsüsa tashishitsü o jembiba atema candidate 10 anema ken o benoka lir.

Samajwadi Party (SP), Shiv Sena aser AIMIM party tem nungibo candidate shilem 50-i parnok anema ken o benoka aliba nangzükogo.

Samajwadi Party candidate 10 nungi 5 anema ken o benoka lir, Shiv Sena candidate 6 nungi asem anema ken o benoka lir aser All India Majlis-e-Ittehad-ul-Muslimeen (AIMIM) candidate 4 nungi ana anema ken o benoka lir.

Bharatiya Janata Party (BJP) candidate 40 nungi 19 anema ken o benoka lir aser Indian National Congress (INC) candidate 18 nungi 8 anema ken o benoka lir.

Yamaji All India Trinamool Congress (AITC) candidate 7 nungi 3, Shiv Sena (Uddhav Balasaheb Thackeray) candidate 8 nungi asem, Rashtriya Janata Dal (RJD) candidate pezü nungi ka aser Biju Janata Dal (BJD) candidate 5 nungi ka anema ken o benoka lir.

India-i Kyrgyzstan nung kaketshirtem dang tekümdangtsü tuyur

New Delhi, May 18 (Agencies): Kyrgyzstan linük nung aonung piyong rara adokba sülen India aser Pakistan nati iba linük nung aliba senso kaketshirtem dang kimai mayazüksü aser kanga kümdanga alitsü tekümdangtsü metetdaksüogo.

Kyrgyzstan yimtiba, Bishek nung lokti tulu kati bendanger kaketshirtem anema inyakba sülen India aser Pakistan nati senso kaketshirtem nem tekümdangtsü metetdaksür.

Kyrgyzstan nung aliba Indian Embassy nung ketdangsertemi ashiba agi, tangbo linük nung tensa süngjemogo ta metetdaksü, ajisüaka Pakistan embassy-ibo iba linük nungi India, Pakistan aser Bangladesh nunger kaketshirtem aika dak azük, ta metetdaksü.

India aser Pakistan embassy napronglai kaketshirtem nem emergency helpline number agüja kaketshirtem dang

tongtepratepa alitsü adoka liasü.

Indian Embassy-i, "Onoki kaketshirtem den tongtepratepdar. Tangbo tensa süngjema lir, ajisüaka kaketshirtem dang kimai mayazüksü metetdaksüba den külemi timtem adokra Embassy den tongtepratepa alitsü metetdaksüogo. Onok indang emergency contact number ji 0555710041 lir," ta metetdaksü.

India External Affairs Minister, S Jaishankar-ia sangdong ka ajanga, India-i iba linük nungi tensa asadanga repringdar, ta metetdaksü.

Osang angazükba agi, kaketshirtem aikati X ajanga, linük yimtiba nung aliba medical university hostel kar nung rara adok, ta metetdaksü.

May 13 nü Kyrgyzstan nunger kaketshirtem aser Egypt nungi kaketshirtem tsüngda mangatettep ka adokba sülen tensa tamajungba küma May 17 aonung rara

May 13 nü Kyrgyz kaketshirtem aser Egypt nungi medical kaketshirtem tsüngda rara adokba video kar Hokolbarnü social media nung prokba nungi rara adoka liasü.

"Tang tashi nung Bishek nung medical universities indang hostel kar aser Pakistan densema linük kar nungi kaketshirtem ki maaka liasü. Item hostels nungi India, Pakistan aser Bangladesh nungi aruba kaketshirtem alir. Pakistan nungi kaketshirtem aika yiruogo," ta Pakistani Embassy nung ketdangsertemi metetdaksü.

Ano tanga osang ka ajanga ashiba agi, yasüing loktii amakba mapang nungi Pakistan nunger kaketshir 3-4 asü aser kar tashiyim amshia raksatsü, ta metetdaksü. Ajisüaka Kyrgyz interior ministry-ibo iba tatalokba nung kaketshir ka danga masü, ta metetdaksüogo.

Haryana nung bus ka nung mi adokba lendong nung nisung 9 asü

New Delhi, May 18 (Agencies): Hokolbarnü Haryana state kübok Nuh district nung tourist bus ka nung mi adokba lendong nung nisung 9 asü aser 15 yiruogo.

Hokolbar anepongi 1:30 ako meta bus nungi temeshi aini aoer teimba ser nisung 60 shi toudak mapang nung bus nungi mi adok.

Osangbener den jembidang Inspector Jitendra Kumar-i, "Iba lendong nungi tetsür trok aser tebur asem asü. Kasa


lendong nung nisung 15 yirua hospital nung mongdar," ta metetdaksü.

Lendong atalokba tesem nung alirtem aser tenük kuli alirtemi police nem iba osang metetdaksüba sülen parnoki bus telung nung alirtemji kümzük. Fire brigade sepaitemi miji ensepba sülen yirua alirtemji anasa aliba hospital-i anir ao.

Osangbener den jembidang iba lendong nungjagi jenbur tantsür kati, "Bus telung nungi

ni ola ka angashi. Ola balaka adok, anungi bus ji ajungketa aliba tesem ka nung jajar südi, ta ni bilema liasü. Ajisüaka ni teshinem ka menem. Onok sülen motorbike anir kati bus ji ajangteta aoba sülen pai bus anisang dang bus nung mi adoker ta ashi. Ni bus tejaklen mena liasü, anungi ni bus nungjagi pongzuka alu," ta metetdaksü.

Tang tashi nungbo bus nung miji komaser adokar mejangja, ta police-i metetdaksü.



May 18, 2024 nü Punjab kübok Patiala nung gari ka tsükokba sülen tangokba noksa nung angur. Iba lendong nung law azünger pezü asü aser ana yiru. Law azüngertemji Hokolbarnü final exam tembangba sülen aonung party ka ayongzuka monger Honibarnep züngia meyipa arudang iba lendong atalok

Northwest India nung taruba anogo 5 kanga tatsük asütsü: IMD

New Delhi, May 18 (Agencies): Tang northwest India tesem aika nung kanga tatsük, aser maneni taruba anogo pongu kanga tatsük asütsü; talisa Delhi, Haryana, Punjab, Rajasthan aser Uttar Pradesh nung kanga tatsük asütsü, ta Honibarnü IMD-i metetdaksü.

Hokolbarnü north India tesem ajaklen kanga tatsük liasü aser southwest Delhi kübok Najafgarh nungbo temperature 47.4 degrees Celsius tashi atu.

Honibarnü India Meteorological Department (IMD)-i, taruba anogo pongu tashi northwest India tesem aika nung kanga tatsük asütsü aser taruba anogo asemnü tashi east & central regions nung kanga tatsük asütsü, ta metetdaksü.

Met office-ia Delhi, Haryana, Punjab aser anüolen Rajasthan nung kanga tatsük asütsü, anungi tatsük metizüktertem kanga

kümdangtsüla, ta metetdaksüogo.

Met office-isa anüodklen Rajasthan, Uttar Pradesh aser Bihar nung 'orange alert' sangdonga kinü tanurtem, teintet sensotem aser chronic tashidak balala agi shirangertem kanga kümdangtsüla, ta metetdaksü.

Met office-isa, Goa aser sub-Himalayan West Bengal nung 'humidity' ajanga nisung aika timtemtsü, ta metetdaksü.

IMD-isa, taruba anogo ana- asem Uttar Pradesh, Bihar aser anüolen Rajasthan nung aonung kanga talem asütsü, ta metetdaksü.

Tang India nung Lok Sabha election tagidak, anungi vote agütsütsü atema mapang talanglang anü pua nokdakba mesüra anü pua mapa inyakba ajanga nisung aika tatsük dak sendakba timtem balala agi shirangtsü, ta mongintemi metetdaksüogo.



May 18, 2024 nü Thane nung Maharashtra Chief Minister, Eknath Shinde-i Shiv Sena (Shinde) candidate, Naresh Mhaske atema nüboyimsüdag tangokba noksa nung angur.



TIR YIMYIM

YIMOBILEM (EDITORIAL)

DIMAPUR AMUNGNÜ, MAY (MONUPII) 19, 2024

Tang tenzüksüla

Tsüngrem tenzüksüba ya alu mapa temer mesüra kisüjensü mapa temer mesüra tanur ajak tain kümer mesüra tang teinyakdak mapa nungi anener tenzüksü ta masü saka kodang jadri mesüra nungloksüdir idangjisa tenzüksüba mapa ka lir. Tsüngrem tenzüksü ajaba aser bilemtetbaji Tsüngremi agütsüba maongka ta angateta idangjisa anidaksüla mesüra inyaksüla. Aji oda, asenok Khristan taküm nung inyaksüba mapaji Yisu Khristai mulungba nung anidaksü asü masü ta bilemdangtsüba masü saka Pai inyadaksünüba mapaji idangjisa inyaksüla. Yisu alima nung alidang nübortem rongnung pa mapa inyaka jajaba mapang, kenü anogo Pa sülen anidaker nisung kati Pa dang pa tebu aremtsü tama melaang ta mepishiba tatalokba otsü ka Mathi 8:21 nung shia angur. Iba otsü nung angatetba agi, Yisui iba nisung dang Pa sülen pa akaba ajak toktsür anidaksü asoshi asüngdang sudi. Aji oda, iba nisung yagia ma tabo mashi saka pa teinyaksü ali mapa ajak temer külenang Yisu sülen anidaknü. Yihuda nungertemi pei tsüraburtem kanga meimer, anungji kodang parnok tantsür tambur kümdir, pei chirnurtemi parnok masü tashi kanga junga anepalur aser sür külenang parnok pei leper nung kanga junga remadoktsür. Yisu dang pei tsürabur tama rema yutsüdi ta asüngdangbaji nisung tsütsübo shitak dang liasü. Laishiri ashiba agi, iba nisung pa tebu tama rema yutsüdi ta asüba tetezüji tebuji ano masü taküm lir asütsüa akok, saka kanga tambur kümer tasür dang alinungji pa tebu akümli mapaji tama tobur junga tembangdakjang ta ashi sudi. Ajisüaka, Yisu sülen anidaksüba asen alima mapa temer külenang ta masü saka ajak toktsür idangjisa anidaksüla. Ibayongjiang, Yisui iba nisung dang ashi, " Kü sülen anidakang aser tasürtemi pei tasür aremtsü tokjang." Tetezü, paji Yisu sülen anidakyongbo tebuji aremtsü aoshibo tasütsü purtem rongnung nübo peria angutsü. Aji oda, Peteri Yisu dang, "Onoki onok akaba ajak toktsür nü sülen anidak," ta Mathi 19 : 27 nung ashiba angutsü. Iba jaji Yisu sülen anidaker nütsüngtem tangatetba aser temulungtetba sayur. Asenok aikati yimten khen tenzükür külenang Tsüngrem tenzüksü ta bilemer, mesüra kinungertem khen yaria lir külenang Tsüngrem mapa inyaksü ta bilemer. Ajisüaka, asenoki asen mapangji memetet. Item ajakji Tsüngrem ket nung lir. Aji oda, kodang Tsüngremi asenok nem langka inyadaksünüa jadri, memenutsüla, kechiyong pai asen nungdak ajak meteta lir. Tsüngremi asenok tenyaba tetezüji oagi kibong ka nung mesüra tesem ka nung lendong lir, kar tesamar lir, kar tekümtet, kar tesünep aser kar taneptsü aginüa atadar asütsüa akok. Ibaji meteta asenoki tashi angatsüla. Tsüngremi ashiba angaba nung temoatsü aser takok ajak keta lir. Atangji, asen taküm nung Tsüngremi ajaba metettsüba kanga tongtibang lir. Tsüngremi ajabaji, ashiko, nisung kar ajanga Tsüngrem tenzüksü ajungshitsüa akok, mesüra kar yaritsü mesüra kar den jungteptsü asoshi temulung nung jembitsüa akok. Itemji meteta asenoki idangjisa inyaksüla. Tsüngremi ajadang melanzüba aser nungloksüba mapa meinyaki süitemdaksüba mapang tajungji kodanga tanaben meyipa marutsü. Ibayongji, Efesa 5:16 nung mapang tajung ajak alanzükang ta shia angutsü. Tetezü, tangar asoshi tajung inyaksü anguba mapang ajakji Tsüngremi agütsüba mapang tajungji asütsü. Tsüngrem mapa inyaksü asoshibo asüng aru matatsüla. Aji oda, nisung kati tebu remer külenang Yisu sülen anidaksü bilemba ama asenok aikati pei chirnur tama züngtetter külenang mesüra pei tsüraburtem nungdak tama ataloktsür külenang Tsüngremi mapa inyaksü bilema alitsüa akok. Ajisüaka, bilemdangang, pei chirnur dang tama mesüra pei tsüraburem dang tama asenok anojungi oadokra koda tesasatsüka asütsü! Kodang Tsüngrem tenzüksü jadri, idangjisa tenzüksüla.

OLEMSABANG

DENGUE TASHIDAK INDANG TEMETETSÜTEM

Dengue shirang ya kechi?

Dengue shirang ya nisung ka nungi ka dak Aedes merila ajanga Dengue Virus benshiba ajanga adoker.

Dengue shirang agi shirangba tamaitsütem:

- * Temang rongga shirangba
- * Tokolak kanga angoba
- * Tenük telung nung mesüpa ashiba
- * Komo adokba
- * Saktsüba
- * Shi tetsü aser nüktenüra ayangba (joint pains)

Shirang tamajungba akümba tamaitsütem:

- * Tango sadema mesashiteti akümstsü
- * Tepok perepa angotsü
- * Saktsü manentsü
- * Teni aser teponü nungi azü ayimtsü
- * Tepok aoba, natzü anaba aser saktsüba nung azü meyokteper alutsü.

Nai Dengue shirang agi menep sudi ta temulung nung tarendakba lira koma asütsüla?

- * Nai tsüba taoksa
- * Yakta doctor bushiang

Aedes merila ya kechi koma?

- * Iba merila yagi anüngdanga tetsübu kecha melii meteper
- * Talisa anepdang yakta aser nikongtsütsü tali kangasa meteper
- * Iba merila yagi mesen koloka yutsütsü asoshi tzü aliba tesem bushia meta talang meter 400 tashi yima senzüteter, saka teti agi nisung aliba anasa alitsü tesem bushir
- * Iba merila kati nisung ka dak nungi tali dak metepsü akoker
- * Parnok mesen entsü nungi merila akümstsü asoshi anogo 7 nungi 10 tashi agir

Aedes merila soyapokyaba/poktetba tesemtem:

- * Tzübo
- * Gari tyre tejen mashi longdoka alibatem
- * Plastic bongdang
- * Atsü nung marok mesüra auso ama mashi mereptoka alibatem
- * Jana mashi sadaka indokba tesem.
- * Nallah
- * Kiojen asüba tesem
- * Tzü ayuba drums

Dengue azüoka ayubayim:

- * Jana timi indoktsüla, merila amungtsüsa jana meindoktsüla
- * Kidang tzü rizünga ayuba bongdangtem hapta shia shidoktsüla
- * Merila marutsü mozütem amshitsüla aser süoshi sentsü tesangwa den temang ayimjema asemstsüla
- * Merila entsü koloka meyutsütetsüsa asen temeket timi rizüngtsüla
- * Tzü rizünga ayuba tzübo aser drum nung mesen achiba ango puoka yutsütsüla
- * Nallah anakora agi tangbanga alibatem junga repringshiyima oktoktsüla

~ District Vector Borne Officer (DVBO)
CMO Office, Mokokchung

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerer angateta agitsü mepishir

Kohima nung 'Indigenous Religion & Baptist Christianity' kaket saya



May 16, 2024 nü Jubilee Memorial Centre, Kohima nung 'Indigenous Religion and Baptist Christianity: A comparative study of the Aos' kaket ka sayaba sülen tangokba noksa nung angur. Noksa nung kaket zülur Japfü Christian College nung Assoc. Prof. aser Dean of Students' Welfare, Dr. Purchila Jamir, Dr. M.Temjen Longkumer, Kohima Ao Baptist Arogo nung senior pastor, Rev. Sentisashi Aier, Japfü Christian College nung Principal, Prof. Visakhonü Hibo aser tangartem angur.

Kohima, Monupii/May 18 (TYO): May 16, 2024 nü Jubilee Memorial Centre, Kohima nung 'Indigenous Religion and Baptist Christianity: A comparative study of the Aos' ta ser kaket tasen ka sayaogo.

Nagaland Institute of Development Studies (NIDS)-i adoktsüba kaket ya Japfü Christian College nung Assoc. Prof. aser Dean of Students' Welfare, Dr. Purchila Jamir-i zülü aser Dr. M.Temjen Longkumer-i yarisema liasü.

Kohima Ao Baptist Arogo nung senior pastor, Rev. Sentisashi Aier-i meshiteta iba

kaket sayaja liasü aser publishir tenüung nung NIDS Chairperson aser Japfü Christian College nung Principal, Prof. Visakhonü Hibo-i o tatsüka jembia liasü.

Iba sentong nung jembidang kaketzülur, Dr. Purcila-i, Mokokchung district kübok Ao area nung tzükong trok kübok yimtsüung 13 ayimjena research agia iba kaket adokogo, ta metetdaksü.

Laisa, akhidang nung o agi dang otsü shia aruba sobaliba samaa odar, kechiyong otsü ashir taintem aika süadoker, anungji research tejangja agia item otsü bendena ayutsüji kanga rongdak nüngdaka

kümogo, ta ashi.

Iba kaket nung Aortem akhi lispour yimsü aser Baptist Khristan yimsü na tsüngda temesüktep aser memesüktep indang tejangja shia lir.

Kaketzülurisa, akhi lisopur yimsü aser külemküja sendoktsü akok, ajisüaka akhi yimsü nung tsüngrem ka akhümtsübuba aser tsüngrem nem tajungtiba tenla agütsüba ama kanga tongtibang sobalitem study asütsü nüngdaker, ta ashi.

Iba sentong ya Japfü Christian College, Kohima nung Assoc. Prof. aser Academic Dean, Dr. Soraisam Bhogen leniba nung agia liasü.

Vietnam sorkari Arogo li nung inyaksangshiba Khristantemi nokdang

May 18, 2024: Vietnam nung sorkari Arogo meyong kimong ka nung school tasen ka amenoktsü sentong yangluba anema Arogo züngsemtemi longkak aiter, ta osang ka ajanga metetdaksü.

1975 küm kimongji ketdangsertem nem khen atema agüja liasü aser iba kimongji Binh Thuan province nung Thanh Hai Arogo meyong lir, ta May 15 nü Arogoi sangdong ka ajanga metetdaksü.

"Sorkar ketdangsertem mesüra putir shingaia onok meyong kimongji agitsü makok," ta Arogo nung züngsem tetsür kati metetdaksü.

Laisa, iba kimongji lar tsürabur aser tetsü-tebou nung meyong lir; parnok South tsütsüleni aruba sülen tsüraburtemi kanga meranga inyakba ajanga iba aliji alangzükteta liasü, ta ashi.

Osang angazükba agi, Arogoi school ana densema aliba 6,136.8 square meters (1.5 acres) kimongji sorkar school tasen ka amenoktsü atema sorkar nem agüja liasü. May 8 nü Arogo nung

züngsem noklang aika Arogo compound nungji adenshia sorkar ketdangsertem inyaksangshi nokdanga liasü.

"Onoki sorkar ketdangsertem dang kimong nungji inyaksangshi ajak anenang ta takhangba agütsü. Iba kimong nungji Arogo indang primary school ka aser middle school ka lapoka liasü," ta parish pastoral council nung züngsem kati metetdaksü.

Sorkar ketdangsertemi Arogo züngsemtemi ashiba ama tashi angaa inyaksangshi ajak anenogo.

March 1 nü senden amendang sorkari school building ka Arogo nem meyipa agütsütsü aser school building ka bendokba sülen tasen süshitsü tebilemba Arogo den lemsatepa liasü.

Sorkar inyaksangshiji Arogoi melunger ajisüaka Arogo züngsemtemibo memelunger.

Thanh Hai Arogo nung züngsem 8,000 shi lir.

2014 küm Arogo ketdangsertemi sorkar dang school aser aliji Arogo nem meyipa agüjang ta mepishia liasü.

"1996 Land Use Declaration," kübok Arogoi

sorkar nem kimongji khenpiga amshitsü atema agüja liasü. Iba mapang nungji tezüngzüktep nung taoba mapang Arogo nung putir aser tang Thanh Hai Ward People's Committee nung chairman, Vu Ngoc Dang-i sign süa liasü.

Ajisüaka Binh Thuan province nung ketdangsertemibo, sorkari Arogo dang kimong khenpiga atema amshitsü memeshi, ta ashi.

1955 küm Arogo nung mezüung züngsemtemji north tsütsülen aliba provinces-Thanh Hoa, Hai Phong aser Quang Binh nung arurtem liasü.

Geneva Accords tezüngzüktep agiba sülen Vietnam nung communist North aser anti-communist South lemdangba mapang nung Binh Thuan province-i arurtemi iba Arogoi tenzüka liasü.

North-i South maakdoka 1975 küm Vietnam ka küma longjemba sülen Arogo kimong nung school anaji Arogoi ketdangsüa liasü aser Arogo nung züngsem chirnurtem dang school ana nungji züngdakja liasü.

ANOGO ABEN TSÜNGREM DEN

KATI KA ASOSHI SARASADEMJANG

Sarasadem aser temepishiba ajak agi Tanela num mapang ajak nung sarasademang. Aser iba nang maneni merangba aser temepishiba ajak nung temeshipur ajak asoshi aser ni asoshi saksalema sarasademang. Efesa 6:18

Temeim amangbapurtem, kati ka asoshi sarasademis koda tongtipang aser temoatsü. Adianutem aika timter khuret balala bener, maka-mait sensak tia nung lir, alish mokokmien jenti bener teimla samar alibapur jenti aser meketa lir. Asen tamang yari parnok asosh sarasademtsütsü koda tongtipang. Tangar asosh sarasademtsüba ya Laishiba nung aika angur; Mosai per nübur dang Tsüngremi aochiang ta sarasadem, Daniel Tsüngrem nüburtem tepuokdak nungi chioktsü asoshi sarasadem, Yisui nütsüngtem, tamangertem ajak asoshi sarasadem, Pauli amangbapurtem asoshi sarasadem.

Tamanger lokti nung kanga dang temoatsü tulu kaji kati ka asoshi sarasademtsüba ya lir. Tsüngrem O jagi ashit. asenoki mapang ajak nung aser Kibuba nüburtem ajak asoshi teti sarasademtsüla. Tamangertem asoshi meteta aser memeteti temenener sang asen meketa jenti lir. Anungji item temenener sang nungi jenbua alitsü, mapang ajak nung kati ka asoshi sarasadema alitsü asen mulung nung teti tanelar tejembiba lidakjangma. Amen

Sangküm Pope Francis-i Turkey semdangtsü

Lisbon, May 18, 2024

(Agencies): Sangküm Turkey nung alima nung Orthodox Khristantem indang First Council of Nicaea anogomong sentong nung adentsü atema Pope Francis-i Turkey semdangtsü tebilemba lir, ta Brihostibarnü osang ka ajanga metetdaksü.

Aso mezüngbuba mapang nungi tenzüka Khristan yimsü nung kodaser Yisu Khrista ya Tsüngrem aser nisung naprongla sütettsü, ta o kanga entepa aru, iba sülen 325 küm First Council of Nicaea nung Arogoi iba onük dak sendakba nung telemtetba agia liasü.

Portugal yimtiba, Lisbon nung sentong ka nung jembidang Istanbul nung amenoka aliba Ecumenical Patriarch Bartholomew-i, "Pope Francis-i iba ama tongtibang anogomong asenok den külemi mongner," ta ashi.

Paisa, Pope Francis-i Istanbul nung Ecumenical Patriarchate of Constantinople semdangba sülen First Council of Nicaea agiba yimti, Iznik semdangtsü, ta metetdaksü.

Ecumenical Patriarch Bartholomew-i, Pope-i semdangtsü aliba atema sentong ayongzüka achaayangtsü asoshi committee ka tentetogo aser kobi melii Vatican-ia Turkey



Pope Francis

sorkar den tongtepratepa iba atemaji jembitsü, ta metetdaksü.

Taküm December ita nung Pope Francis arrshi küm 88 ajungtsü. Pa kanga tambur akümba aser temang nung mekokmein aliba agi ainlen senzütsü kanga tasak kümogo.

Talisa pa temekok nung timtem aliba ajanga pa oli-oratsü atema pai ajok ka mesüra wheelchair dang amshir.

Pa temang nung timtem aliba agi lokti nung aiben mejembir aser taküm Good Friday sentong densema pai tongtibang sentong aika nung shilem magiteti liasü.

Ajisüaka taküm September ita tetenzüklen pai Indonesia, Papua New Guinea, Timor-Leste aser Singapore linüktem aser September ita tatemanglana Belgium semdangtsü tebilemba lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Süngshimangrang

(n) süng tashi nung mangrang adokba (moss collected on dead wood)

* Süngshimangrang ya süng kar nung dang adoker.

Süngsüng

(n) süngmok mesükba terunem menemba chiyongsü (a type of ginger)

* Süngsüng ya mozü ama achiba chiyongsü ka lir.

OLONG PAITEP # 6791

15x15 crossword grid with numbers 1-19 indicating starting positions for clues.

TIPIEN

- 2. Teburtemi tejak nung awaba - (8)
- 6. T ___ em - (3)
- 8. Tzük ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaksü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 6790 TELANGZÜBA


TIPIEN :

- 1. Tashi, 4. Ayip, 6. Kiyimla,
- 7. Min, 8. Rongsen, 11. Nok,
- 13. Sangken, 14. Rong, 15. Senti

LANGTSÜNGLEN :

- 1. Tenyar, 2. Shimen, 3. Ayim,
- 5. Pongsen, 6. Karanur, 9. Senden,
- 10. Nükshi, 12. Kinü.

NAI-A YA METETTER MA



Meghalaya nunger Dominic Megam Sangma-i direct asüba "Rapture" film May 15, 2024 nü sayaogo. France nung theatres 100 tema nung iba film sayaogo aser iba ajanga alima nung Garo cinema agizükba sayur. Rapture ya Anna Films Shillong ajanga produce asü Capricci Cinema-i Anna Films Shillong den yaritepa France nung iba film sayaogo.

Tripura BSF-i gold biscuit 4 apu

Agartala, May 18, 2024 (Agencies): BSF sepaitemi May 18, 2024 nü Tripura nung gold biscuits 4 apu aser iba indang jenjangji Rs 36.6 lakhs shi lir.

Osang tejangja ka angazükbs sülen BSF-i West District kübok Nischintapur nung mita ata.

"Iba mapang international boundary aser border fence tsüngda temulung melemi bilemer nisung ana angu. Border Observation Post nungi BSF sepaitemi parnok senzüba repranga ata aser Bangladesh tsütsü nungi India lushii aitba sülen tena arem kati ai saka sepaitemi tena rongnung ka api. Ajisüaka arem min ajanga nisung ka Nischintapur tsütsü jena ao" ta BSF ktdangsür kati ashi.

BSF sepaitemi apuba nisungji Prashant Rai (36) ta jangjaogo aser pa ya West District kübok Amtali nung alir.

"Pa ket nung Yellow colour metal biscuits (466 grams) pezü bena aliba apu aser hon indang jenjangji Rs 36.6 lakhs shi asütsü" ta ktdangsürisa ashi.

Iba nisung yagi trans-border smuggling inyakba nangzükogo aser Bangladeshi smuggler Iqbal-i pa nem hon bener yokba ashi. Iqbal ya Bangladesh kübok Brahmanbaria nung alir. Pa den külemi alisang aputsü atema BSF sepaitemi arrtsülen bushitepdar, ta ktdangsürisa metetdaksü.

Manipur nung nisung tepsetba atema 1 apu

Imphal, May 18, 2024 (Agencies): Manipur nung nisung ka pur oa tepsetba aser ka yirutsüba atema police-i puogo aser ano nisung ana aputsü bushitepdar.

Iba mapa nung nisung 13 gang ka bushitetogo aser parnok rongnung tetsür ana dena lir.

Lilong nung lanur ka tepsetba dak sendakba nung nisung ka puogo ta Honibarnü police-i ashi.

Iba nisung ya Md. Achouba (27) ta jangjaogo aser pa ya Thoubal district kübok Lilong Kaleikhong nung alir. Lilong Police aser Thoubal commandos külemi yaritepa Kaleikhong nung iba nisung apu.

Tang tashi nung police-i iba ken o dak sendakba nung nisung 11 puogo.

Maneni, police-i Periphery Protection Force (PPF) convenor Th. Roshan Singh aser Md. Boboy (Hassan) na aputsü bushitepdar.

May 15, 2024 nü Keibung Mathak Leikai nung alir Moinam Md. Tomba aser Md. Farid Khan (Boycha) na pur ao.

Iba sülen Md. Tomba indang tasü mang angu aser Farid Khan kanga mejungi yirutsür liasü.


LANLIA

Wb. K. Imtuilin Longkumer (Asangma) aser Wt. Limainla Jamir na jabaso Sp. Temjenwapang. I. Longkumer ICFAI University Nagaland nungi Bachelor of Computer Applications nung Gold Medal anguba aser Batch of 2019-2022 nung "for his overall performance in academic and extracurricular activities" atema "Best Student Award for the Year 2022 from BCA" indang Certificate of Merit ngutetba asoshi kinungertemi pa dang kangasa pelaa tenü sang agütsür. Tsüngrem tenüng sanga pa tarutsü anogotem asoshi sarasademtsür.



Kinungertem tenüng nung, Wb. K. Lanu Longkumer

MULUNGNEN O



Asoba : 5th Aug 1939 ~ Tasuba : 13 May 2024

Onoki teti meima aliba Tsürapur Asür CHAYUPANGI JAMIR Longmisa (Retd. Teacher) Kibubai moatsüba akümlir wadang May 13th 2024 anogo nü tembanga pilaogo. Iba mangyimba tia nung alidang ana aser talang nungi shirnoki sa Nübu, Rongsen, aser Sarasadem agi nungita yaritepogo nenok ajak dang pelaba lemsateper, nenok temeim mapa onoki kodanga mamadoktsü asen takar Tsüngremi nenok maneni moajang ta ozü sarasadem.

~ Kinungtsü, Chirnurtem, Anükapang, Semchirsepnurtem.

Tripura BJP-i opposition party anema lungkak ait

Agartala, May 18, 2024 (Agencies): Tripura nung BJP-i Honibarnü state kübok tesem balala nung lungkak aitba sentong ayonga agiogo.

CPIM aser Congress dena opposition political party temi tiyazü jembia BJP aitsüba ajanga nübortem ratadaksür ta BJP-i shia lungkak aitogo.

"BJP-i aniba state sorkar anema Opposition-i tiyazü onüktem jembir aser iba ajanga nübortem ratadaksür" ta BJP Tripura President Rajib Bhattacharjee-i ashi.

"Onoki iba anema lungkak aiter. Nübortem chiyungtsü, mapa manguba den tanga timtem ajanga kangshir ta opposition-i ashir. Chief Minister Prof. Dr Manik Saha-i aniba BJP sorkari scheme balala tenzüka nübortem yaria arur" ta pai ashi.

"Tawa petrol aser diesel khurettem ajurubaji lenmang mokdangba ajanga liasü. State sorkari iba tebilemtsü koktettsü atema mapa inyakogo.

Opposition-i taila osangtem prokshir aser nübortem ratadaksür" ta Rajib Bhattacharjee-isa ashi.

"Opposition-i osang tiyazü aser taila prokshiba nung mamangtsü ni nübortem dang mepishir. Parnok indang tebilembaji nübortem ratadaksütsüba lir" ta paisa ashi.

State sorkari yimjung bener arutsü aser tashishitsü melii ktdangsütsü meranger, ta paisa shisem.

"Prime Minister Modi aser BJP atema temelen kecha mali. Onoki nübortem ajangzüktsü aser renloktsü atema inyaker. Left Front-i vote bank politics atema lisopurtem amokbanger ayuba asenoki nguogo" ta Bhattacharjee-isa metetdaksü.

"Lok Sabha election shilem pezübuba agiogo aser iba ajanga BJP-i sorkar akümtsü aser Narendra Modi-i kümsük tasemben atema Prime Minister inyaktsü ta asenoki shiteter" ta paisa ashi.

Afghanistan tzümetsüng lendong nung nisung 50 asü



May 18 nü Afghanistan nung Ghor province kübok Firozkoh tesem tzümetsüng agi kongshiba sülen Afghan nungertem parnok indang oset bener nokdaktepaba aliba noksa nung angur.

Monupii/May 18, 2024

(Agencies): Central Afghanistan nung tzüinglu kanga sashia aruba den tzümetsüng aruba sülen nisung 50 süogo, aser nisung meyirejang aika talidak ki maka kümogo, ta ketdangsurtemi metetdaksü.

Hopta aika tzüinglu aruba ajanga ayongtem moshia yima tzümetsüng arudaksüba sülen Afghanistan kübok tesem balala nung nisung aika süogo aser nisung meyirejang aika yiruba den aika talidak maka kümogo.

Ghor province künok nisung 50 asüba osang jangjaogo, ta police otongdar Abdul Rahman Badri-i Honibarnü ashi. Paisa, lendong nung asürtem timba akümtsü imlar, ta shisem.

"Tzümetsüng lendong nung nashi chang meyirejang aika süogo. Iba ajanga alu hectar noklang aika, apu aser culvert noklang aika aser süngtong meyirejang aika raksatsüogo,"

ta pai ashi.

Osang ajanga ashiba agi, nisung aika samara bushidar, ta Ghor indang provincial governor otongdar Abdul Wahid Hamas-i ashi.

Ghor atema information department tekolakba Mawlawi Abdul Hai Zaeem-i ashiba agi, tzümetsüng ya Hokolbarnü nungi tenzük aser iba ajanga tesem aikati aoba lenmang nokdangogo.

Paisa, ki 2,000 ajunga raksatsüogo aser ki 4,000 terara raksatsüba den province yimtiba, Firoz Koh nung dokan 2000 dak tema tzü agi metsünger lir, ta ashi.

Taoba Hopta Taliban Ministry for Refugees-i ashiba agi, northern Afghanistan nung tzümetsüng lendong nung asür 315 jungogo aser nisung 1,600 dak tema yirur lir.

Afghanistan ya menoknok, yipru aser tzümetsüng amala

lendong agi aiben kongshir aser United Nations-i ashiba agi, iba linük ya tzü-mopung melenshiba ajanga tamajungtiba kongshiba linük rongnung ka lir.

Ghor nung ayong nung tsükertem kümzüksü merangba mapang Bodhbarnü Afghan Air Force-i amshiba helicopter ka timtem adoka tsükoka liasü. Ayong nung tsükertem ya ka asü aser 12 yirua liasü, ta Ministry of Defence-i ashi.

Taoba mapang tzümetsüng agi kongshirtem pei talidak ki toktsür jenshiogo aser parnok teyari peria mongui lir. Lendong nungi jenburtem, ki, ali aser senotsü aatsü atema kecha lenmang maka kümogo, ta United Nations World Food Programme (WFP)-i ashi.

Baghlan ya lendong agi tamajungtiba kongshiba province ka lir aser iba province yagi tang tashi truck tem moteter, ta WFP-i ashi.

Houthi teloki ano US MQ-9 Reaper drone ka khazüka yokogo

Sana'a, Monupii/May 18

(Agencies): Yemen nung amendaker aliba Houthi teloki Hokolbarnü ashiba agi, parnoki America nunger indang drone ka khazüka yokogo. MQ-9 Reaper drone asütsü ta bilemba drone teraksa ka indang video ka online nung prokshiba sülen parnoki iba osang lensatapa liasü. Honibarnüa Temerem tzüyim nung parnoki rong ka makogo.

Gaza Strip nung Israel aser Hamas na raraba dak sendakba nung Houthi teloki jenjang balala agia aruba rongnung iba ya tesüsabuba tatalokba asütsü.

Houthi military otongdar Brig. Gen. Yahya Saree-i ashiba agi, parnoki surface-to-air missile ka amshia Bresthostibarnü iba Reaper ya khazüka yoka liasü. Paisa, iba drone ya Yemen kübok Marib province nung inyaksangshia liasü, ta ashi. Iba province ya alima kintemi agizüker aliba Yemen sorkar tazüokba kübok lir.

Iba sülen Houthi puri surface-to-air-missile ka aonung khaketa yokba indang video ka den missile yagi drone dak akhaba night-vision footage saya liasü. Nisung ka indang ola, koba maitsü mejangjadaksütsü atema digitally yanglushir liasü, iba nisungba yagi Houthi telok indang yimyim "God is the greatest; death to America;

death to Israel; curse the Jews; victory to Islam" ta ayimba angashiogo.

Online nung video ajanga Reaper mesükba drone ka raksar ali nung tsüka aliba aser drone nungi mi adoka aliba sayuogo.

Iba dak sendakba nung U.S. military-i tang tashi nung kecha telangzüba agüja mali. Houthi teloki taoba mapang parnoki minyakba mapatema parnoki inyak ta shia aruogo, saka parnok nem teyari agütsür tongtiba Iran-i hadir balala agüja parnoki taoba mapanga US indang drone tem khazüka yokogo.

2014 küm Houthi puri linük yimtiba Sanaa densema linük north atsüingba sülen parnoki US indang drone pongubo khazüka yokogo.

Reapers drone ya ka nung USD million 30 shi intoka yanglur, aser iba drone yagi ali nungi süktep 50,000 pilar yimtetba den khen danga maneni ghonda 24 tashi inyaksangshiteter.

Gaza nung rara anentsüh kanga Huothi teloki Temerm tzüyim aser Gulf of Aden nung rongtem amakba mapangka nung tang drone ya khazüka yokogo.

Taoba küm November ita nungi tang tashi nung iba telok yagi rongtem tenemben makogo, rong ka puogo aser ka

raksaja angümoka idaktsüogo, ta U.S. Maritime Administration-i metetdaksü.

Kasa mapang nung Honibarnü British military indang United Kingdom Maritime Trade Operations center-i ashiba agi, Yemen kübok tzüküm nung aliba Hodeida yimti anasa rong ka makogo.

Rong indang captain-i ashiba agi, rong indang port quarter mejangjaba missile ka agi kongshiba sülen rong tera raksaogo, ta UKMTO-i ashi. Rong aser crew ajak kümzüka lir aser parnok maneni jajadar.

Private security firm Ambrey-i ashiba agi, iba rong ya Panama wako songa aliba crude oil tanker ka asütsü ta bilemer.

Radio traffic-i ashiba agi, rong ya missile ka agi kongshi aser rong indang steering gear flat nung mi adoka liasü, ta Ambrey-i ashi.

Iba rong amakba indang Houthis puri nangzüka mali, ajisüaka yimya agi parnoki ghonda ishika sülenang osang agütsür.

Houthi puri rong balala amakba tawa tajemba kümogo, kechiyong parnok ya US-i aniba telok kati anüing ajanga maka arudar. Ajisüaka amokmeren tali aliba ajanga Temerem tzüyim aser Gulf of Aden ajanga rong aikabo mesüier.

ONOKI KANGA MEIMA ALIBA
K. TIASUNEP TZUDIR
SÜR KÜM 3 AJUNGBA MENUNGRAA BILEMTETER



6th April 1978 - 19th May 2021

Temeim oba,

Nai kanga dang ajungbena onok toktsür aoba ajanga onok temulung raksar. Na onok den maliba asoshi onok kanga azüngmeyaker aser na akümüli nung maliba ya onoki magizükteter. Saka Tulusang Tsüngrem tsüngdang asenok kodanga mepilatsü.

-Temeim Jala, Jabaso, Kinungtsü, Tsüraburtem aser Sosem-Tangsem.

MULUNGNEN O



24:02:1936 - 11:05:2024

Tesayur tajung aser temeim tsürabur **Imkongtenla Longkumer** (Longjang) khenpiga leni moi aliba mapang nungi Kibuba dangi aoba anogo tashi kija-kibong, lokti, arogo aser onok dang aria bilema meimertem shirnokisa onok nungdak reprangteta yaritepogo, nenok ajak dang onoki kanga pelaba lemsateper.

Nenok temeim mapatem asoshi Tulusang Tsüngremi moajangma ta onoki sarasademtsür.

- Temeimbatem.

Myanmar nung telungpurtemi linük anüolen jila ka atsüng

Bangkok, Monupii/May 18

(Agencies): Myanmar nung telungpur telok kati Honibarnü ashiba agi, parnoki Rakhine state nung jila ka atsüngogo, koba junta atema ano takoksa ka asütsü.

Taoba küm November ita nungi Arakan Army (AA)-i security forces amak tenzükba sülen Rakhine nung mepetmesü tulu adoker lir.

AA telungpurtemi India aser Bangladesh na den arrtsü nung aliba tesem aika atsüngogo aser iba ajanga junta nem khuret timba bendenloktsüogo, kechiyong parnok linük kübok tanga tesemtem nunga telungpurtem den raradar.

"Onok northern Rakhine state kübok Buthidaung nung Myanmar Army base ajak atsüngogo," ta AA-i Honibarnü parnok indang Telegram channel ajanga metetdaksü.

Onoki atsünger aliba tesemtem rongnung "military strategic headquarters" ka densema lir, ta AA-i ashi, saka osang tejangja magütsü.

Buthidaung jila ya state yimtiba Sittwe nungi km 90 shi pilar lir, koba tang tashi military-i azioka

lir.

Iba ita tetezüklen AA-i ashiba agi, parnoki Buthidaung anasa military base ka amakba sülen junta personnel noklang aika puogo.

AA ya Myanmar kübok arrtsü nung inyaksangshiba telungpur telok aika rongnung ka lir. 1948 küm Britian nungi nüjiso anguba sülen telungpurtem ya timba nüjiso meshia military den rara arudar.

AA yagi state kübok Rakhine nungertem nem tashi tali agütsütsü khanga rara arudar.

Taoba küm November ita nungi Rakhine state kübok jila 17 rongnungi 15 nungbo mepetmesü adoker lir, ta UN indang human rights tekolakbai ashi.

Rara tenzükba sülen nisung noklang aika tepsetogo aser yiruogo aser nisung 300,000 dak tema jenshiaogo.

Military aser AA na tsüngda 2019 küm raratepba sülen iba tesem nung meptmesü tulu adok aser nisung 200,000 shi jenshia liasü.

Iba tesem nung military-i 2017 küm Rohingya nunger amak tenzük, koba tang United Nations genocide court case ka kümer lir.

WADA-i Parveen Hooda nem tenokdangba agütsü



Parveen Hooda

Monupii/May 18, 2024

(Agencies): Taküm Olympics atema quota ngur alila Parveen Hooda nem World Anti-Doping Agency (WADA)-i ita 22 atema tenokdangba agütsüba ajanga India boxing team tetsür 57kg category atema quota maka kümogo aser asayashitsüsa akümtsü. Ita 12 tsüingda la kong koma ali iba indang asemben tashi osang magütsüba atema la nem tenokdangba agüja liasü.

Taoba küm Asian Games nung bronze medal anguba sülen Hooda-i Olympic quota angu, ajisüaka 2022 küm April ita nungi 2023 küm March ita tashi nung WADA tetuyuba sülen manidakba atema iba ya atalokogo.

"Parveen Hooda nem International Testing Agency (ITA)-i ita 22 atema tenokdangba agütsüogo, kechiyong lai la inyakyim indang asemben tashi osang agütsü," ta Boxing Federation of India-i sangdong ka ajanga metetdaksü.

Ajisüaka ken o dak sendaka aliba lokti tentettem den sensak asema sülen Praveen nem tenokdangba agütsüba ya ita ishika atzüka alu aser Hokolbarnü nungi tenzüka ita 14 atema dang tenokdangba agütsüogo. Mezüingbo la nem ita 24 atema tenokdangba agütsür liasü.

Iba tetezü Parveen Paris Games nung shilem magitetsü. Boxing nungbo quota ya linük

team nem masü saka kija asayartem nem agütsür.

Iba tetezü tang tashi nung India nung Boxer, Nikhat Zareen (50kg), Preeti (54kg) aser Lovlina Borgohain (75kg) nungeri dang quota nguteta lir.

Olympic qualifier tatembangbuba May 24 nü nungi tenzüka Bangkok nung asayatsü lir, anungji tetsür 57kg weight category nung qualify asütsü asoshi ano maongka ka lir. Ajisüaka April 11 nü tashi nung züngoksemer aliba reserve asayartem dang asayatetsü.

"Iba tetezü 60kg aser 66 kg category atema reserves ama züngoksemer aliba asayar ana dang Bangkok nung tokteptetsü," ta BFI-i ashi.

Registered Testing Pool (RTP) nung züngoksema aliba asayartemi parnok anenzükba tesem indang address ajak, parnok training agiba, mapa inyakba mesüra parnok teti mapa inyakba tesem aser address tejangja aser maparen ajak indang mapanglem agütsütsü nungdaker. Iba tetuyuba sülen manidakra asayartem merenshir.

WADA temzüng ozüng kübok ita 12 tsüingda asayar temi parnok inyakyim aser parnok kolen ali iba indang osang tejangja magütsüra iba ya anti-doping rule nung aibelen ka ama züngshir aser küm ana tashi tenokdangba agütsür.

Geneva Open atema Djokovic nem wild card agütsüogo

Monupii/May 18, 2024

(Agencies): French Open masaya tsüingda tatembangbuba clay court asayamung Geneva Open atema Novak Djokovic nem wild card agütsüogo, aser pa tanabuba round nung Andy Murray den asayatsü akok.

Tebur asayartem rongnung temba ajenang nung alisang Djokovic nem Hokolbarnü wild card agütsüogo aser asayamung ayongertemi metetdaksü. Asayamung main draw ya Deobarnü tenzüksü.

Murray nema wild card agütsü aser pai mezüingbuba round nung Yannick Hanfmann kokra pa tanabuba round nung Djokovic den asayatsü.

Djokovic aser Murray na tang tashi asaya aruba nung Djokovic-i 25 ben aser Murray-i 11 ben koka lir, kong Grand Slam nunga Novak-i 5 ben aser Murray-i 2 ben akokba densema lir. Ajisüaka tena 2017 küm February ita Doha nung tatemsa asayaba sülen küm tenet tashi khen danga masayai arudar. Iba final asaya ya Djokovic-i koka liasü.

Tena ya Bodhbarnü Djokovic küm 37 ajungbanü

asayatsü akok. 2011 küm sülen Djokovic tang mezüingbuba Switzerland nung asayatsü lir.

Taoba Deobarnü Italian Open tasembuba round nung world no. 32 asayar Alejandro Tabilo-i mimlai lia tsükdaksüba sülen Djokovic Roland Garros nung masaya tsüingda clay nung asaya tali asayatsü merangdar.

Pa ya tebur asayartem rongnung Grand Slam (24) timtiba akokba asayar lir. French Open ya May 26 nü tenzüksü.

Djokovic taküm clay nung asayaba asayamung Monte Carlo nunga asayaogo, ajisüaka pa semifinal nung Casper Ruud-i tsükdakja liasü. Kasa mapang nung 2021 aser 22 küm Geneva nung iba asayamung akokba sülen Ruud iba asayamung tasembububa akoktsü merangdar.

Djokovic Switzerland kübok Basel nung tatemsa 2011 küm October ita asayaogo, kong pa semifinal nung Kei Nishikori-i tsükdakja liasü. Basel ya Roger Federer indang hometown asayamung lir aser Djokovic-i taoba mapang iba asayamung final nung anaben tashi Federer kokogo.

Arne Slot-i Liverpool coach Jurgen Klopp melentsü

Monupii/May 18, 2024

(Agencies): Feyenoord coach Arne Slot-i Hokolbarnü sangdong ka ajanga, taruba season pai Liverpool coach mapa atema Jurgen Klopp melentsü, ta jangjatsüogo.

"Officially osang kecha sangdonga mali, ajisüaka ni taruba season coach mapa agizükba ya nenok atema osang tasen ka masütsü," ta Slot-i osangbenertem dang ashi.

BBC-i taoba ita ashiba agi, Klopp melentsü atema Slot indang deal ji pound million 9.4 asütsü.

AZ Alkmaar nung mezüing coach mapa kanga takok ngua inyakba sülen Slot 2021 küm Feyenoord-i ao.

Pa lensisüba nung mezüingbuba season Feyenoord pur mezüingbuba Europa Conference League final-i ai, ajisüaka parnoki Jose Mourinho-i aniba Roma team goal 1-0 agi tera agi mekoki liasü.

Maneni pa lensisüba nungsa iba club yagi küm 24 tsüingda taoba season tanabuba league title bena liasü aser iba sülen pai club den küm asem atema tenangzüktepba yanglushi.

Tang asaya aliba season tembangba sülen Klopp-i Liverpool manager mapa toktsütsü. Liverpool nung küm teku inyakba mapang Klopp lensisüba nung club-i 2019 küm Champions League akok aser küm ka lir Premier League koka



Arne Slot

liasü.

Klopp melentsü atema mezüingbo Bayer Leverkusen coach aser taoba mapang Liverpool midfielder Xabi Alonso asadanga liasü.

Ajisüaka Alonso-i Leverkusen metoktsütsü atema telemteba agi. Pa lensisüba nung Leverkusen puri taküm mezüingbuba Bundesliga title benogo.

Tang asaya aliba season nung Feyenoord puri Dutch Cup kokogo aser league nung PSV Eindhoven sülen tanabuba jenang nung lir.

Slot lensisüba nung iba season parnok league asaya ana nung dang tamakok ngua lir. "Onoki Deobarnü takok ngura point 84 ajungtsü aser club puti otsü nung Feyenoord team tajungtiba rongnung tanabuba asütsü," ta pai ashi.

Tizu Warriors & Chathe Dazzlers nati takok angu

WOMEN'S CHAMPIONS TROPHY



Dimapur, Monupii/May 18

(TYO): Tang asaya aliba 3buba Women's Champions trophy nung Honibarnü Nagaland Cricket Stadium nung Tizu Warriors aser Dhansiri Titans na asaya Warriors-i wicket 4 agi kokogo.

Asaya nung Titans puri over 20 nung asayar ajak out sür run 86 yanglua liasü. Parnoki rongnung Sarah-i run 22 yanglu. Warriors atema Kunti Subba-i tongtibang wicket ana agia liasü.

Run arishiba mapang Warriors puri over 19.5 nung run menepa liasü. Parnok rongnungi

Iduabeule-i out mesüi kanga dang tongtibang run 28 yanglu aser iba den lai wicket ka agiba ajanga la nem Player of the Match naroküm agütsü.

Kasa anogo Sovima Cricket Ground nung Chathe Dazzlers-i run 57 agi Zungki Slingers kokogo. Dazzlers nungi Najmeen Khatun-i ball 69 nung out mesüi run 89 yanglu aser ano lai wicket ka agia liasü, aser iba atema la nem player of the match naroküm agütsü. Dazzlers puri asayar 4 out sür run 144 yanglua liasü.

Asaya tanabuba shilem nung Slingers puri asayar 6 out sür

run 87 dang yangluteta liasü. Parnoki rongnungi Illuneule-i run 20 yanglu aser wicket 2 agia kanga junga asayaogo.

Iba asayamung final ya Nagaland Cricket Stadium nung May 20 nü Tizu Warriors aser Chathe Dazzlers na asayatsü. Team anapronglai asayamung tepeyong kanga junga asayaogo aser parnok championship title abentsü atema tokteptsü.

Iba asayamung final reprangtsü atema asayamung ayongertemi tejangrartem ajak pelashishia jaokba kasa sangdong ajanga metetdaksüogo.

BILEMDANGANG

"Temelenshi maliba lokti tejakleni aotsü tasak."